

Friday, November 14, 2025

Time - 2:30pm - 2:35pm

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



DAMPA BY-POLL

Dampa Assembly by-election ah MNF Candidate Dr R. Lalthangliana thlan tlin a ni.

Dampa by-election a vote tla vawiina chhiar ah Postal Ballot leh Round nga (5) chhiar zawh a ni tawh a, MNF Candidate Dr R. Lalthangliana’n vote hmu sang berin vote 6981 a hmu a, Amah hnaih bertu rorel lai ZPM candidate Pu Vanlalsailova nena an inthlauhna hi vote 562 a ni.

Dampa Assembly by-election tluang taka neih zawh anih tawh hnuah tukin dar 8 atang khan vote tla chhiar tan a ni a, MNF Candidate Dr R. Lalthangliana’n vote 6981 a hmu, ZPM Candidate Pu Vanlalsailova’n dawtin vote 6419 a hmu a, Indian National Congress Candidate Pu John Rotluangliana’n vote 2394 hmuin BJP Candidate Pu Lalhmingthanga’n vote 1541 a hmu a, PC Candidate Zahminga’n vote 50 a hmu a ni.

Dampa biala thlan tlin MNF Candidate Dr R. Lalthangliana hian vote zawng zawng zinga za zela 40% a hmu a, ZPM Candidate Pu Vanlalsailova’n vote za zela 37% hmu in Congress Candidate Pu John Rotluangliana’n vote za zela 14% a hmu a, BJP Candidate Pu Lalhmingthanga’n vote za zela 9% a hmu a ni.

Dampa bial by-election hi Mizoram Politics-a By-Election inthlanah eptu party an chak vawi 3-na a ni a, kum 1983 khan Indian National Congress ticket in Phuldungsei Assembly bialah Pu Liansuama’n rorel lai PC party alo hneh tawh a, kum 2021 ah tuna Chief Minister Pu Lalduhoma’n rorellai MNF Candidate Pu Vanlalzawma chu Serchhip by-election ah a hneh ve leh a, Dampa bial by-election hi eptu party an chak vawi 3-na a ni.

Heti hian tun dinhmunah Mizoram Legislative Assembly ah rorel lai ZPM Party chuan MLA 27 an nei dawn a, MNF in MLA 10 neiin BJP in MLA 2 an nei a, Indian National Congress in MLA pakhat an nei dawn a ni.

(RD Darthanzauva PTC Mamit)



DR R. LALTHANGLIANA

Dampa bial by-election a thlan tlin Dr R. Lalthangliana’n Dampa bial hmasawn theih nan theihtawp a chhuah tur thu a sawi a, Pu Lalrintluanga Sailo in hmasawnna tura hmachhawp alo neih tawh te tih hlawhtlin a tum hmasak tur ani tih a sawi.

Dampa bial by-election a vote tla hi vawiin khan chhiar a ni a, he biala thlan tlin MNF Candidate Dr R. Lalthangliana chuan Pathian leh a thlang tlingtu mipui hnenah lawmthu a sawi a, pary-a a thawhpuite nen theihtawp an chhuahna zar ani tih sawiin Dampa biala vote percentage sang tak chu democracy hlutna lantirtu ani tih sawiin inthlan an ngaih pawimawh avangin lawmthu a sawi a, Dampa bial mipuite hnenah a lawm takzet tih a sawi a ni.

Dr R. Lalthangliana chuan a campaign chhungin Dampa biala khaw 30 chuangah vawi 6 lai a fang chhuak a ti a, an harsatna lai leh hmasawn an ngaihna laiah khawtlang hruaitute rawnin theihtawp chhuah zui a tum thu sawiin kawng hrang hrangah hmasawn turin tan an la dawn tih a sawi bawk.

Dr R. Lalthangliana hian amah hnaih ber tu ZPM Candidate Pu Vanlalsailova aiin vote 562 in a hmu tam zawk a, Dampa bial by-election a Returning Officer Pu Malsawmzuala chuan Member of Legislative Assembly member nihna certificate a hlan nghal a ni.

Voicecast

Dr R. Lalthangliana hi kum 1986-ah MNF Party zawmin party chhungah nihna hrang hrang chelhin tunah hian Sr. Vice President ni lai a ni a, Term ruk (6) zet MLA ni tawhin (Lunglei North) bial-ah a zawnin term 5 chhung MLA ah thlan tlin a ni a, Hnahthial bialah term khat tlingin Mizoram MLA zingah chatlak awm lova mahni biala tling rei ber a ni. Term 6 chhung MLA a nih lai hian Cabinet Minister term thum a chelh a, hengah hian Department hrang hrang enkawlin chak takin hna alo thawk tawh a, tunah hian Dampa bialah thlan tlin leh niin hei hi a vawi 7 MLA nihna tur a ni dawn a ni.

(RD Darthanzauva PTC Mamit)



'JANJATIYA GAURAV VARSH'

Larsap, General (Rtd) Vijay Kumar Singh-a'n Mizote chu tribal hnam ziarang leh nunphung la chhawmnung zel tute an ni tih sawiin, India ramen zalenna a neih theih nan leh British awpbegna dodal nan Mizoram pawhin theihtawp a chhuah tih a sawi.

India ramen zalenna a hmuh theih nana tribal hruaitu thawh hlawk tak, Bhagwan Birsa Munda pianchamphaphak vawi 150-na pualin vawiin khan Mizoram pumah 'Janjatiya Gaurav Varsh -Tribal Pride Day' lawm a ni a, Mizorama a lawmna pui ber chu Planning & Programme Implementation Department buatsaihin Raj Bhavan Circular Lawn-ah vawiin khan Larsap, General (Rtd) Vijay Kumar Singh hovin hman a ni a. Larsap chuan India tribal-te tana hun pawimawh tak 'Janjatiya Gaurav Varsh' puala Mizoram mipuite chibai bukin India rama chengte chu tribal kaihhnawih nei vek an nih thu leh, a thenin tribal hnam ziarang leh nunphung an kalsan tawh lain a thenin an la chhawmnung zel a, Mizote chu a la kalpui zelte zinga mi a ni a ti a, Tribal hnamte chu an chhehvela thil awmte nena lungtual taka chengho thiam, nakin zel thlenga khawsakna tlak ram a awm theih nana pawimawh tak an nih

thu a sawi a, tribal-te hnam ziarang leh nunphung hausa tak humhalha chawilar a nih theih nan Prime Minister-in theihtawp chhuaha hma a lak thu a sawi a ni.

Larsap chuan India ramn zalenna a neih theih nan leh British awp behna dodal nan sakhua leh hnam tih bik awm lova theihtawp chhuaha hmalak tlan a ni tih sawiin, tribal-te chu heng zinga pawimawh tak an nih thu sawiin, pawnlam awpbehna laka him nan Mizoram pawhin theihtawp a chhuah a ti a. Janjatiya Gaurav Varsh chuan mitin thinlungah tribal-te hmasawn nana bei tura inpekna thar leh hmasawna awmze nei a awm theih nana harh tharna thlen se a duh thu a sawi bawk.



BIHAR ASSEMBLY

Bihar Assembly inthlan vote tla vawiin khan chhiar a ni a, tun dinhmun ah NDA ten seat 243 ah seat 190 la in hneh takin hma an hruai.

Bihar Assembly ah hian seat 243 a awm a, Deputy Chief Minister pahnih leh BJP candidate pahnih Vijay Kumar Sinha leh Samrat Choudhary te chu hma hruai mek zingah hian an tel a, hneh takin NDA an sawrkar tura ngaih a ni.

(NewsonAIR)



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn a, vawiin November ni 14 thleng dilna hi thehluh theih a ni.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawk ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.

